

Ko te Pukapuka Tuatoru a HOANI Kupu Whakataki

Te Pukapuka Tuatoru a Hoani i tuhia e “Te Kaumātua” ki tētahi o ngā kaiārahi o te hāhi ki a Kaiu. E whakanui ana a Kaiu mō tāna āwhina i ētahi atu Karaitiana me te whakatūpato atu anō mō tētahi tangata, tōna ingoa ko Rioterepi.

Rāpopoto o Ngā Take

Tīmatanga 1-4

Ka whakanuia a Kaiu 5-8

Ka whakahētia a Rioterepi 9-10

Ka kōrero paitia a Rimitiriū 11-12

Whakamutunga 13-14

He Mihi

¹ Nā te kaumātua –

Ki a Kaiu, ki te hoa aroha, ki tāku e aroha atu nei i runga i te pono.

² E te hoa aroha, nui atu i ngā mea katoa tāku īnoi kia kake koe ki te pai, kia ora. Kia pērā anō me tōu wairua kua kake ki te pai.

³ Hari pū hoki ahau i ngā tēina i haere mai nei, i whakaatu mai i te pono i roto i a koe, arā i tāu haere i runga i te pono.

⁴ Kāhore ōku hari e nui atu ana i tēnei, arā kia rongō ahau e haere ana āku tamariki i runga i te pono.

Ka Whakanuia a Kaiu

⁵ E te hoa aroha, pono tonu tāu mahi e mea nā koe mō ngā tēina, mō ngā tāngata iwi kē anō hoki.

⁶ E whakaatu nā i tōu aroha i te aroaro o te hāhi. Nā, kia rite ki tā te Atua tāu kawē i a rātou, ā, ka pai tāu mahi.

⁷ He whakaaro hoki ki tōna ingoa i haere atu ai rātou, kīhai anō i riro i a rātou tētahi mea a ngā tauiwī.

⁸ Koia i tika ai kia whakamanuhiri tātou i ngā tāngata pēnei kia ai hoki tātou hei hoa mahi mō te pono.

Ko Rioterepi rāua ko Rimitiriū

⁹ I tuhituhi atu ahau ki te hāhi; otirā, kāhore mātou e manakohia mai e Rioterepi, ko tāna hoki e pai ai ko ia kia meinga hei tuatahi mō rātou.

¹⁰ Mō konei ki te haere atu ahau, ka whakamahara ahau i āna mahi e mea nei ia, ki te kino o āna kupu i a ia e komeme mai nei mō mātou; kāhore hoki tāna i mutu i konei, kāhore ia e manako ki ngā tēina, e riria ana hoki e ia ngā tāngata e pai ana kia pērā, e peia ana i roto i te hāhi.

¹¹ E te hoa aroha, kaua e arumia te kino, engari te pai. Ko te tangata e mahi pai ana, nō te Atua ia; tēnā, ko te kaimahi i te kino, kāhore anō ia kia kite i te Atua.

¹² E kōrerotia paitia ana a Rimitiriū e te katoa, e te pono anō hoki. Āe rā, ko mātou anō ētahi hei kaiwhakaatu; e mōhio ana koutou he pono tā mātou whakaatu.

Poroporoaki

¹³ He maha ngā mea hei tuhituhinga atu māku, otirā, e kore ahau e pai kia tuhituhi atu ki a koe ki te mangumangu, ki te pene.

¹⁴ E mea ana hoki ahau tērā ahau e kite wawe i a koe, ā, e kōrero tāua, he māngai, he māngai.

Kia tau te rangimārie ki a koe!

Tēnei ngā hoa aroha te oha atu nei ki a koe. Oha atu ki ngā hoa aroha me te whakahua anō i te ingoa o tērā, o tērā.

Te Kawenata Hou

Maori: Maori NT - converted from RTF LAI

copyright © 1952,2008 Bible Society New Zealand Charitable Trust

Language: Māori

Contributor: Bible Society New Zealand

Te Kawenata Hou

Maori New Testament

Bible Society New Zealand

This translation is made available to you under the terms of the Creative Commons Attribution-No Derivatives license 4.0.

You may share, redistribute, or adapt this Bible translation or extracts from it in any format, provided that:

You include the above copyright and source information.

You do not use this work for commercial purposes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-10-16

PDF generated using Haiola and XeLaTeX on 31 Oct 2025 from source files dated 31 Oct 2025

f5251fa7-4780-5900-96bf-6211b45050b2